

Odžak će izgradnjom koridora 5C predstavljati vrata BiH za ulaz turista

Piše: E. M./Klix.ba
prije 16h 13 min

Općina Odžak prošle godine bila je jedno od najvećih gradilišta u Bosni i Hercegovini. Zahvaljujući koridoru 5C, Odžak će predstavljati sjeverna vrata Bosne i Hercegovine što će ovoj maloj sredini dati više značaja.



Foto: Filmedin Mehic/Klix.ba

Načelnik Odžaka Hajrudin Hadžidedić za Klix.ba je kazao kako je u toku izgradnja mosta, te da je u prošloj godini izgrađeno 11 kilometara koridora 5C i dio zaobilaznice.

"Sve ovo do sada što je izgrađeno posebno je važno za nas ako uzmemo u obzir vrijednost do sada realiziranog projekta. Prošle godine smo bili jedno od najvećih gradilišta u Bosni i Hercegovini, a 2014. godine smo bili općina koja je imala najbolji prekogranični projekat. Turska nam je finansirala oborinsku kanalizaciju, Svjetska banka je obezbijedila određena sredstva za putnu infrastrukturu, a u ovoj godini imamo u planu i izgradnju vodovoda i navodnjavanja bitnih područja. Naša poljoprivreda nakon majskih poplava iz 2014. godine imala je velike probleme zbog suša gdje smo imali štetu od tri miliona KM, ali i to ćemo riješiti za naredni period", kazao je Hadžidedić.

Uprkos svim problemima koji su pogodili ovu općinu, Hadžidedić je istakao kako je njeno poslovanje u posljednje tri godine bez deficita i da su u toku veliki planovi za naredni period koji će biti prezentirani za Dan općine Odžak koji se obilježava 8. februara.

"Iako imamo velike planove, ne mogu da ne spomenem problem sa kojim se susrećemo kao mala sredina. U cijeloj Bosni i Hercegovini veliki broj mladih odlazi van granica, ali za Odžak je specifično da odlaze i oni koji imaju posao. Odžak je poznat po svojoj dijaspori, mi imamo dvije velike poslovne zone, ali naša dijaspora šuti. Radi se o velikom kapitalu, ali ljudi se teško odlučuju za investicije u Bosni i Hercegovini", kazao je Hadžidedić.

Nadležni su uradili sve što je bilo potrebno kako bi privukli domaće, ali i strane investitore u Odžak te se nadaju da će privreda u ovoj općini krenuti u drugom smjeru. Vjeruju da će se u narednom periodu otvoriti radna mjesta koji će u mladima probuditi želju za patriotizmom i angažmanom na domaćem tržištu bez volje da što prije napuste granice Bosne i Hercegovine.